




Tira pasagad nga pagpamomba: BINUHATAN SA MGA PASISTA UG TERORISTA



Hugot nga gikondena sa rebolusyonaryong kalihokan ang tira-pasagad nga pagpamombang nagkahitabo karon sa tibuok nasud. Ang nagahimo niini klaro nga mga **terorista ug walay konsiyensya** kay walay gipili nga target diin kasagaran ang nangahimong mga biktima mga inosenteng sibilyan. Si kinsa man ang nagahimo niini dako og tulubagon ngadto sa katawhan ug sa rebolusyonaryong kalihokan.

Kahibudngan kaayo nga bisan sa gipanghinambog sa AFP ug PNP nga **triple red alert** -nga-kamandoang ilang gipakanaog ngadto sa ilang mga pwersa, nakalusot ug nagkahitabo pa gihapon kining tira-pasagad nga pagpamomba? Ug dali lang ra ba dayong makahimo og konklusyon ang AFP ug PNP nga ang naghimo niini mga “teroristang MILF kun dili man ang Abu Sayyaf o kaha NPA”.

Ang NPA adunay nagbarog nga palisiya sa dili pagdahig o pag-angin sa mga inosenteng sibilyan diha sa ilang taktikal nga opensiba batok sa AFP, PNP, CAGU. Kun mahitabo man nga sa paglunsad og taktikal nga opensiba adunay sibilyan nga mapagan, kini tungod na sa mga sikumstansyang wala kalikayi nga maisip natong kabahin

na sa limitasyon. Apan kun aduna man, andam dayong moako sa publiko ang NPA sa responsibilidad aron sa pagpangayo og pasaylo. Apan kutob sa mahimo hugot gyod niining giampingan nga walay bisag usa ka sibilyan ang mapagan. Busa kining pagpamomba sa mga publikong lugar ug sakyanan nahisupak na sa *standing policy* sa NPA.

Ang MILF aduna usay palisiya nga nanghimaraot niini. Ang Abu Sayyaf usab kun duna silay pagahimuon ila man dayong paga-angkonon. Pananglitan kun aduna silay pagasilotan o gi-hostage o gi-kidnap magpagawas man dayon sila og pamahayag nga nag-ako niini. Apan kining nahitabong pagpamomba wala pa man silay giangkton.

Sa pikas bahin lahi usab ang kinaiya sa AFP o sa PNP. Hugot usab silang nagsubay sa gitudlo sa ilang *mentor* nga CIA diha sa JUSMAG sa “dili pag-angkon o pagpangulipas (neither confirming nor denying)”. Maora bitaw og uwak

nga bisan nagtangag na mosingggit pa gyod nga “waa- waa”. Moangkon na lang kun kusog na kaayo ang opinyong publiko o sa laing pagkasulti kun “naipit na”.

Balikan nato kining nagkahitabong tira-pasagad nga pagpamomba. Kun ato pang mahinumdoman, pipila ka bulan pa lang ang milabay, nagpadayag na og tinguha ang rehimeng US-Estrada sa pagdeklara og *state of emergency* sa Mindanao kun dili man sa tibuok nasud. Apan gisugat kini og mga pagbatikos ug grabeng pagsaway sa mga nagpakabanang katawhan. Ang rason sa katawhan nga walay igong basehanan aron ideklara ang martial law bisan sa tipik lang sa nasud . Labaw na sa tibuok Pilipinas.

Medyo “nahilom” ang maong isyu. Apan unya, kadungan sa pagsilaob sa gubat sa AFP batok MILF, misunod ang pagpang-hostage sa Abu Sayyaf, ug human niini, nagsunod-sunod na dayon ang tira-pasagad nga pagpamomba diha sa mga publikong lugar ug mga sakyanan.

Ug sa tibuok nasud, ang matang sa bombang gigamit tipong *time-bomb* nga inato ang pagkahimo ug nga sumala pa sa usa ka taas nga opisyal sa PNP “nakaagi gyod og treyning sa maong gimbuhaton”. Nan, karon si kinsa man ang nakaagi og treyning sa maong gimbuhaton? Siyempre, ang MILF nakaagi. Ingon man ang Abu Sayyaf. Mao usab ang NPA. Apan labaw na gyod ang AFP! Anaa gyod nila ang tanang kahigayonan ug lugar aron makahimo og treyning.

Apan “krudo” kaayo pagkahimo ang maong bomba. Plansa ra gyod sa uling. Busa dili gyod kini sa AFP. Kay inato ra kaayo. Binulay-og. Wala na gyoy lain. Kun dili MILF, o Abu Sayyaf, nan, siyempre, ang NPA gyod. Morag husto sab no? Kini, kun niini nga anggulo nato tan-awon.!

Apan angay natong timan-an nga hanas kaayo sa *psychological operation* ang AFP subay sa gitudlo sa ilang CIA nga *mentor*. Naa gyod kanila ang tanang kahigayonan ug lugar. Busa, kun ang AFP maghimo og “krudo o bulay-og” nga bomba kaya kaayo nila kining himuon. Makahimo man gani og sopistikado ug modernong bomba kini pa ba kaha, nga “krudo ug bulay-og nga pagkahimo”. Mas maayo pa gani kun “krudo ug binulay-og” ang pagkahimo aron layo ra kaayo sila sa pagduda ug pasangil.

Apan nganong himuon man usab kini sa AFP o PNP? Ngano? Hinumdoman nato nga ang AFP ug PNP nabahin ug nasiak karon. Dunay loyal kang Estrada samtang aduna usa’y dili.

Sa mga loyal kang Estrada, siyempre, subay sa maksimum nilang katuyoang ideklara ang martial law, may igo-igo na silang basehanan tungod niining kaylap nga pagpamomba. Ug gani tungod niini, ang mga tawo pa seguro mismo ang “mopursige” kanila nga ideklara na ang balaod militar. Apan subay sa psy-ops “magpadoding” pa kunohay sila. “Magpaigot” matod pa sa mga *mahjong aficionados*.

Sa minimum nga katuyoan tingale,aron mapabalik ang *mental alertness* sa iyang mga personel ug mapasalmot ang katawhan sa pagbantay/pagpaniid batok sa mga kadudahang tawo ilabi na sa mga “rebelde”. Pinaagi sa pagmugna sa sitwasyon/kahimtang (nga niining kasoha, ang tira-pasagad nga pagpamomba) mahiusa/ma-rally nila ang katawhan pagbatok sa usa ka butang, isyu o panghitabo. Kabahin kini sa *military psy-ops*. Sa esensya, kontra-insurhensya kini nga taktika.

Mao kini ang nahitabo karon sa MILF. Nagmalampuson ang rehimen paghulagway niini isip mga “terorista” busa nagkakusog ang sentimentong anti-Muslim sa katawhan. Naestablisar nila ang moral nga basehanan aron gubaton ang MILF.

Una, ang pagbomba sa Super 5 Bus kaniadtong bulan sa Marso didto sa Ozamis. Giakusahan dayon sa AFP ang MILF nga maoy naghimo niini. Ikaduha, ang pagpangilkil kuno sa MILF dapit sa may Narciso Ramos Highway bisan kun sumala pa sa mga residente sa lugar (sumala sa Mayo 19 nga isyu sa Asiaweek), mga kabatan-onan sa lokalidad ang nagahimo niini ug dili ang mga MILF.

Apan pagka-wala na bay konsiyensya sa AFP ug PNP nga hangtod ang mga inosenteng sibilyan ilang pagabiktimahon? Dili ba sila man ang protektor sa katawhan?

Nahinumdom pa ba kita sa Jabidah Massacre? Sa Mendiola Massacre? Sa Lupao? Sa kapuloan ka libong biktima sa kalapasan sa tawhanong katungod? Sa kalibonan ka pamilya karong nangabiktima ug nakabakwet gumikan sa paturagas nga pagpamomba didto sa Sentral Mindanao? Dili ba kini nagpakita nga basta makab-ot lang ang katuyoan sa AFP ug PNP wala silay tahuron. **Ang resulta mao ang mohatag og katarungan sa pamaagi.** Usa ka makademongyong taktikang Machiavellian. Sila ang tinuod nga mga terorista.

Sa mga dili loyal kang Estrada, siyempre ang ilang katuyoan mao ang pagde-istabilisar sa rehimeng Estrada aron ilunsad ang usa ka kudeta. Kahinumdoman nga ang presidente sa Ecuador napalagpot na pipila ka bulan ang milabay pinaagi sa kudeta. Misunod niini ang nahitabo karon sa Fiji nga nagkudeta sab (sa pagsulat niini, wala pay dugang kalamboan sa panghitabo didto). Busa kining hungihong sa kudeta batok kang Estrada dili halayong posibilidad.

Ang uban *posible* sakay-sakay na lang sab sa kahigayonan ilabina kining pagpamomba sa Elema ug LCI. Kay may nagduda sab nganong wala man lagi ang Bachelor?

Bisag unsa pa man, ang nahinganlan sa itaas nga duha ka mga esenaryo mao ang pinakaduol nga posibilidad. **AK**